

# LA PATRIE DAL FRIUL

SFUEI MENSÎL INDIPENDENT

www.lapatriedalfriul.org

info@lapatriedalfriul.org

Direzion e Aministrazion - Udine - via del Cottonificio 129

Tassa pagata / Taxe perçue Udine Italy - mensile / mensil spedizion in abonament postâl Poste italiane s.p.a.



TILIMENT

## Cuâl avignî pal re dai flums alpins?

Servizis a pagj. 4-5

EDITORIÂL

❖❖ No mi plasin i cimitieris militârs. A rapresentin la imagjin distutive di chê tristerie umane che cun future e ven calmade dal dûl e dal ricuart dai vîfs. Cuan che duncje mi è capitât di visitâju, o ai provât plui rabie che comozion, massime cuan che i cimitieris a son chei des vitimis de Grande Vuere, embleme e simbul de retoriche nazionaliste, che il Friûl al ospite il plui grant santuari, Redipulie; e chel, clamât il "cimitieri dai erois" a Aquilee, leât aes celebrazions dal Soldât no cognossût. Lûc vuê pôc cognossût, in realtât, ma che al è stât la ponte di diamant de propagande fassiste su la vitorie mutilade, celebrade prime di D'Annunzio e dopo di Mussolini. No jeri mai stât di persone, ma o vevi viodudis lis fotografiis dal stât di abandon che si cjatave e, dal vèr, la situazion mi è someade ancjemò piês de descrizion. La jerbe e parone, al somee che nissun a 'nd vebi cure. Par tiere, i rescj di cualchi corone deponude intant di une cerimonia uficiâl, lis crôs inrusinidis

dal timp e des intemperis, i monuments funeraris che a testemonein la dismentie che ur è destinade, e lis peraulis scritis sul marmul che vuê a tornin su la bocje di politics e governants.

❖❖ Dôs a son stadis lis mès reazioni. La prime e je che al somee che la storie a cualchidun no i vedi insegnât nuie, la seconde e je stade une domande: ma ce nazion ise chê che no à cure dai siei muarts? Mi soi dît che e je une nazion cence anime, buine di tantis peraulis, la retoriche apont, ma che no je in stât di tradusi in pratiche ogni pinsîr virtuôs.

❖❖ E no par cês mi rimbombave il sproc, tant cjâr ae Leghe di Salvini, chel "prime i talians" doprât par presentâ une linie politiche che e volarès jessi dongje dai interès dal popul. Le clamin sovransim, che za di par se al rapresente une contradizion, memoreant une figure regnante, di dissendence divine, duncje sacre e che e contemprave sotans e no citadins.

❖❖ Ma dopo o soi lât plui inlâe mi soi domandât: ma il sovransim talian ce puedial compuartâ pai furlans, di là dal aspjet morâl e ideologic? Semplic: dome par fermâsi ai grançj

avigniments, dôs vueris mondiâls, emigrazion, servitûts militârs intal passât prossim e, intal presint, tassiss, burocrazie cressinte, une autonomie simpri mancual speciâl e simpri plui dipendente di Rome, cul risultât che vuê o sin la regjon che e registre diviers macrofatôrs negatîfs: la denatalitât, la popolazion plui anziane, un Pil che al spauris, la desertificazion de mont, la pierdite di miârs di piçulis impresis, une agriculture che e je in agonie.

❖❖ E cuan che tu domandis a cui che al guverne midiant di chel sproc, di meti in vore ats concrets

par frontâ une situazion dramatische - che nissun nol ameteve prime, o pensi ae Serracchiani, e nancje vuê, viôt Fedriga -, tu cjatis rispuestis di profil bas come se e bastàs une aspirine par frontâ un cancar che al cres.

❖❖ Al sucê di piês cuan che la rispueste pussibile e tocje progjets plui larcs, e in non dai solits "interès superiôrs" si tâs e si consint: îr Terna, vuê la tierce corsie, tant a pain simpri i furlans.

❖❖ No si trate di rimplaçâ, cemût che in maniere furbe si è fat in campagne elettorâl, "i talians" cui natîfs dal lûc, duncje no predicjìn un "prime i furlans" che al compuarte simpri e dut cês graduatoriis e un judiç che lis validi, ma la comprension che une idee federaliste e je stade cancelade e che e torne di mode, inmodernade e corete, une Patrie romane, cun atribûts italics che o vin za cognossût. E a son stâts berdeis seris par ducj, un disastri pal Friûl, che - cemût che si sa - di Patrie a 'nd à une sole e no je piçule. ■

## ❖ a pagjine 2

«MAMIS E PAPÀ,  
FEVELAIT FURLAN  
AI VUESTRIS FÏS»

L'apel di Marianna Tonelli,  
che e à fat l'esam  
di maturitât in lenghe

## ❖ a pagjine 3

«O VOLÏN ZUIÂ AL CENTRI  
DES RIFORMIS. LA PRIORITÂT?  
LA RAI IN FURLAN»

Interviste a Markus Maurmair,  
gnûf president de Assemblee  
de Comunitât linguistiche furlane

## ❖ a pagjine 6

INDUSTRIE 4.0.  
AL COVENTE FAT SISTEME  
E I ZOVINS LU ÂN CAPÏT

Lis gnovis gjenerazions a somein  
jessi ladis di là des barrieris  
dal "fasin di bessôi"

## ❖ pagjine 7

GIBELLI: «NO SON BÊÇS PAL TEATRI  
FURLAN». MA PAI TEATRIS  
DI TRIEST A 'ND È SIMPRI

Vie libare al Teatri stabil furlan.  
In Europe lis esperiencis in lenghe  
minoritarie a son vivarosis

## ❖ a pagjine 8

PARLAMENT EUROPEAN  
ANCJEMÒ CENCE JUNQUERAS,  
PUIGDEMONT E COMÏN

Il Stât spagnûl al va dilunc  
a fâi cuintri al exercizi dai dirits  
politics dai trê eurodeputâts



DIRIT AE LENGHE E AL AMBIENT

# «Mamis e papà, fevelait furlan ai vuestris fîs»

L'apel di Marianna Tonelli, attiviste ecologjiste dal moviment *Friday For Future*, che e à fat l'esam di maturitât in lenghe

Erika Adami



MARIANNA TONELLI, IN PLACE LIBERTÀ A UDIN, DILUNC UNE MANIFESTAZION DAL MOVIMENT FRIDAY FOR FUTURE

**E** à simpri fevelât par furlan, in cjase e in paîs, 'Sevean di Bagnarie. Il talian lu à imparât dopo, cuant che e à tacât la scuelute. Marianna Tonelli – studentesse dal ultin an dal liceu artistic "G. Sello" di Udin, orientament Arts figurativis, e attiviste ecologjiste dal moviment *Friday for Future*, che al domande misuris concretis par fermâ i cambiament climaticis sul esempli de proteste pacifiche de studentesse svedese Greta Thunberg – e à ideis claris e tante determinazion. E cussì, dopo che la riforme dal exam di maturitât e à gjavât la tesine, li che fantatis e fantats a svilupavin un teme di lôr interes, Marianna e à pensât che l'esam lu varès sostignût par furlan, la sô lenghe, trat distintif de sô identitât. E, ai 2 di Lui, e à rivât a fâlu, ancje se dome une part, in graciis de buine colaborazion tra la sô scuele, l'Ufici Scolastic Regionâl e la Agenzie Regionâl pe Lenghe Furlane, sintût il Ministeri de Istruzion. La richieste di Marianna e cjate legitimazion te normative di tutele des minorancis linguisticis, ma il furlan, di fat, al è presint tes scuclis superiôrs dome in maniere limitade e sperimentâl, e duncje – a àn fat savê di Rome – nol è pussibil sostignî dut l'esam intune lenghe che no ven doprade pal solit a scuele.

A 19 agns, fats ai 3 di Lui stâts, un diplome te sachete scuasi cul massim dai vôts (ancje se, e dîs, «i numars no son dut te vite»), ma soreddut caratar e tante voie di fâsi scoltâ e cambiâ il mont in miôr, Marianna si prepare a partî pe France, cul Friûl e cul furlan tal cûr.

Marianna, parcè âstu volût so-

**stignî une part de prove orâl dal exam di maturitât par furlan?**

«La riforme dal exam di maturitât mi veve lassade cenceperaulis. A son stâts gjavâts il teme storic e la tierce prove, il cussì clamât "Quizzone", e po ancje la tesine di presentâ al orâl, là che une studentesse o un student a sielzin un argoment par esprimi devant de Comission lis lôr competencis e cognossincis, e sestis. Cussì, par personalizâ il plui pussibil il gno exam, o ai pensât di sostignîlu te mè lenghe mari, il furlan, ancje se no ai podût fâlu par intîr, tant che o varès volût. O ai fevelât de mè esperience di alternance scuele/lavôr».

**E ce ur aial parût ai commissaris?**

«Lis reazioni dai commissaris (cuatri di difûr, comprendude la presidente, e trê internis) a son stadis positi-

**«La mè sielte e je stade ponderade e profonde, le ai fate ancje par esprimi il bisugn di mantignî un leam cu lis mès lidris»**

vis. No mi spietavi che scuasi ducj a capissin il furlan, di fat o vevi il sostegn di une interprete pe traduzion simultanie. Ae fin dal orâl, mi àn fat i compliments, a àn capît che la mè sielte no je stade un mateç (tant che cualchidun altri, magari cussì no, al à pensât), ma une sielte ponderade e profonde, le ai fate ancje par esprimi il bisugn di mantignî un leam cu lis mès lidris, di no dismenteâ di dulà che o ven».

A proposit di lidris, la tô famee ce

**«O sperî che altris fantatis e fantats a capissin che fevelâ te lenghe mari al è un vantaç che al vierç lis puartis a tantis pussibilitâts»**

**ti aie dit?**

«Mi à sostignude te mè sielte, fin dai inizi. Mè mari e je ancje vignude a sintî il gno exam orâl, si è ingropade, e jeri plui agjitade di me. Istès mi àn sostignude i miei amis, di scuele e no. Mighe come cualchi adult in rêt...».

**Ven a stâi?**

«Sul *web*, plui di cualchidun mi à cjapât pal cûl e al à vût comentis velenôs. Altris – tancj te vite vere, no in rêt –, invezit, mi àn fat i compliments. E tra chescj une vore di coetanis. Ur dîs graciis a ducj e o sperî che, in futûr, altris fantatis e fantats si rindedin cont che capî e fevelâ te lenghe mari (furlan o altris, nol impuarte) al è un vantaç, no un svantaç, che al vierç lis puartis a tantis pussibilitâts, ben plui di ce che si pues pensâ. Par esempli, fe-



MARIANNA LA DÌ DE SÔ PROVE ORÂL DAL ESAM DI MATURETÀ

velâ furlan mi à judât a imparâ altris lenghis, come cul francês cumò. O fâs un apel: mamis e papà, fevelait furlan ai vuestris fîs fin di picinins, ju avantazarès pal avignî! La lenghe – che al è impuartant che e vegni insegnade a scuele – e à di diventâ prin di dut part di nô, un mût par esprimisi, par mantignî lis nestris lidris, par no pierdi il contat cul passât...».

**... e par vierzisi a chei altris, par vie che cui che al cres cun plui lenghis (ancje chês minorzadis, come il furlan) al à une cussience plui grande des diviersis culturis e di chei altris ponts di viste. Che al meti il cûr in pàs cui che al pense che si va lontan tal mont dome se si sa l'inglês.**

«No pensi che un che al sa l'inglês al sedi plui inserît tal contest globâl, chest resonament al marche dome une limitazion mentâl che e sconfuarte. Cognossi il furlan, tant che altris lenghis, tradizions, culturis, al è pardabon chest che al vierç il cjâf e la strade a une fantate o a un fantat viers il mont».

**A àn vût scrit che la tô sielte di fâ l'esam par furlan e je stade une azion di "testemoneance civil e culturâl". Ti spietavistu cheste leture?**

«Il gno obietif nol jere chel che a fevelassin di me sui gjornâi, ma di rivendicâ une individualitât che in di di vuê e ven menaçade di plui bandis. Il fat che la mè sielte e vedi vût grande risonance, però, mi à fat cjapâ cussience de sô impuartance. Ma se altris no laran indevant su chest troi, al sarà stât dibant».

**Cemût le pensino sul furlan i tiei coetanis?**

«In classe scuasi ducj lu capivin, cualchidun lu fevelave e, dilunc des lezions, alc si diseve par furlan. Ma a son ancjemò tancj pregiudizis su la lenghe: tancj si vergognin di cjarcarâle, le tegnin tant che une robe di vecjos, cence capî, invezit, lis tantis oportunitâts che e ufrîs».

**Isal un leam tra il valôr che tu dâs al furlan e il to impegn in difese dal ambient?**

«Sì, al è. Interessâsi dal propri ambient sot ducj i aspjets – di chel naturalistic a chel linguistic – e agjî, fâ alc par che al miori, e je une responsabilitât, se no un dovê, di ducj».

**E il to interes pal ambient, di dulà isal nassût?**

«De educazion che o ai vût in famee (Marianna e je la ultime di cuatri fîs, ndr) e de curiositât tal provâ gnovis esperiencis».

**Cemût sèstu jentrade tal moviment *Fridays For Future*?**

«In graciis di un gno compagn di scuele, Aran Cosentino (il fantat che al à fat una bataie cuintri de centrale idroelettriche sul Alberone, tes Vals dal Nadison, e le à vinçude, ndr). Al è stât lui, sul imprim di chest an, a sburtâmi a cognossi cui che e jere Greta e ce che e stave fasint. Cussì, tal mès di Fevrâr, o sin lâts in place a Udin, cui nestris cartei, o jerin intune cincuantine. Ducj a àn viodût i grancj siopars dai 15

di Març e dai 24 di Mai, a Udin tant che in dut il mont, ma pôcs a san che daûr e je une scuadre che si cjate, di Fevrâr, ogni vinars, e che e continue a progetâ azions di puartâ indevant sul nestri teritori, par prime la Declarazion dal stât di emergjence climatiche tal Comun di Udin, che o stin spietant une rispueste di Avrîl».

**Il vuestri impegn, che no si ferme, al è za, invezit, une rispueste a chei che us àn dit, a voaltris fantats, che o levis in place dome par no lâ a scuele.**

«Critichis che a son superadis dai fats. Clâr che tra tancj, cualchidun al jere in place dome par rondolâsi, ma ancje chei, insom, a son stâts visâts di alc di seri che al sta sucedint, di une emergjence globâl che e risce di robânus il futûr e che e domande fats».

**Ce vèso in cantîr cumò a Udin come moviment?**

«Cun chei altris grups locâi de region (Cjargne, Gurize, Pordenon e Triest) o stin cirint di fâ rêt. E o vin tacât a colaborâ ancje cun altris realltâts, par esempli cui No Planet B».

**Al è l'impegn public, ma ancje chel che al tocje la sfera personal. Ognidun di nô al pues fâ tant pal ambient.**

«Dal sigûr! A cjase mè, o provîn a autoprodusi prodots che si doprin pal solit: dentifrici, detersifs... ma a son tantis strategiis che si puedin

**«Interessâsi dal propri ambient sot ducj i aspjets – di chel naturalistic a chel linguistic – e fâ alc par che al miori, al è un dovê»**

meti in vore par ridusi il propri impat sul ambient: par esempli si puedin cuistâ buracjis di doprà al puest des butiliis di plastiche (in Italie si 'ndi doprin sù par jù 8 miliarts al an, masse, no mo?). O pûr, par ridusi i contignidors di plastiche, parcè no tacâ a doprà il shampoo o il deodorant compats? Dispès a son ancje lis versions veganis di chescj prodots. E savint trop dams che a fasin al ambient i arlevaments intensifs e la pesce industriâl, parcè no cirî di eliminâ de proprie diete cjar e pes? O almancul, di ridusiju? In sumis, lis opzions par une vite plui "eco" a son, no vin plui scusis».

**E pal to avignî, ce ideis âstu?**

«Ae fin di Avost o partirai pe France, li che o starai sîs mès tant che frute a pâr. I miei impegnis pal ambient a laran indevant. Par cumò no ai tal cjâf di continuâ cui studis – il sisteme scolastic mi à deludude cetant –, ma no lu esclût pal avignî».

**Imagjinistu il to futûr in Friûl?**

«Tancj zovins, ancje furlans, a van tal forest, e un motif al è. Magari cussì no, no pensi che mi fermerai in Friûl, ancje par chest o stoi cirint di coltîvâ la cognossince des mès lidris, de mè lenghe, de mè culture, par vuardâlis e fânt capitâl ancje cuant che o sarai lontane». ■



INTERVISTE A MARKUS MAURMAIR, GNÛF PRESIDENT DE ASSEMBLEE DE COMUNITÂT LINGUISTICHE FURLANE

# «O volìn zuiâ al centri des riformis. La prioritât e je la Rai in furlan»

L'apel: «Scoltin i teritoris dal Friûl che si sintin margjinalizâts.

Tant che la ex Provincia di Pordenon»

Roberto Pensa

Al è nassût in Sudtîrôl, ma al è un "furlan doc" il gnûf president de Assemblee de Comunitât linguistiche furlane. Insume, al è un che l'autonomisim e la difese des minorancis ju à intai gjens e intal cûr de passion civîl, culturâl e politiche. Ai 9 di Lui passâts (vilie dal so complean, pardabon un biel regâl!), Markus Maurmair al è stât elet par aclamazion di un centenâr di coleghis sindics dal Friûl (vicepresident al è stât nomenât il sindic di Dartigne, Alessandro Marangoni). Maurmair, 45 agns, originari di Bressanone/Brixen (Bz), ma aromai trapiantât salt a Voleson Darzin - Comun li che al è il prin sindic dopo de fusion dal 2015, dopo che al à vuiddât dome Voleson -, al è ancje president dal Pat pe Autonomie. Un curriculum di rispjet che cumò al metarâ a disposizion de zovine istituzion che fin vuê e à vût a cjâf Diego Navarra. «La atenzion che o ai cjetât intai coleghis e il lôr vôt unanim mi àn fat tant plasê pe stime intai miei confronts che mi àn dimostrât - al scjaris Maurmair -. Cun di plui, il percors che o ai za fat dentri de Assemblee de Comunitât linguistiche furlane mi à fat capi la impuartance di cheste istituzion che e sta ancjemò nassint. O sin ancjemò

**«La prime bataie e sarâ chê di puartâ a cjase une convenzion cu la Rai che e ricognossi finalmenti in maniere plene la esistence e i dirits dai furlans»**

intune fase di inviament, ma o soi convint che intal futûr dal Friûl e podarà vè une sô funzion impuartante ancje intal butâ jù chei mûrs che fin cumò si son manifestâts in tiermins di vecjo ricuart des Provinciis».

**Chel che si vierç al è un mandât impuartant. Il prin al à segnât l'inviâsi de istituzion, cumò si spietisi une partence definitive e ancje une plui grande capacitât di incidi su la realtât legjislativa e amministrative regionâl. Intant al è ancjemò di completâ il cuadri des adesions, viodût che i "Comuns ribei" a àn refudât cheste istituzion che e je nassude, ancje se cuntune logjiche cetant diverse, dentri de riforme che e à introdôt lis Unions teritoriâls**

**intercomunâls...**

«Saltâts fûr des secjis de vecje vicende des Uti, a son cumò dutis lis kundizions par une adesione ae Assemblee di ducj i Comuns che no vevin acetade cheste riforme. La adesione aes Uti di fat aromai no je plui obligatorie e e je anzunziade une largje riforme istituzionâl. I Comuns ribei a puedin cumò jentrâ cun serenitât inte Assemblee de Comunitât linguistiche furlane. Il prin obietif al è duncje passâ dai 119 Comuns cumò aderents ai cirche 150. Il secont obietif al è chel di dotâ di une struture operative la Assemblee. Par fortune nus ven dât un supuart de Arlef (la Agenzie Regjonâl pe Lenghe Furlane), ma al è un jutori minim. O crôt che sigurâ un stanziament pes esigjencis organizativis de Assemblee al sedi il minim. Cumò o vin di fâ une domande di contribût anuâl e spietâ une rispueste, pierdint cussî mês in spiete des risorsis par operâ. In alternative, la Assemblee e va dotade di personâl. La Assemblee e à tancj compits: pensâ che dut si puedi fondâ su la buine volontât dai sindics nol puarte di nissune bande. Al volarès di relegâ il rûl de Comunitât linguistiche furlane dome a un lûc di testimoniance ideâl. Jo o refudi cheste impostazion e o pensi a di une istituzion che e à une grande schirie di competencis».

**Il condurâ di une mancjance di risorsis, validaressie il suspjet che la Regjon e vueli tignî la Assemblee ai margjins e relegade a di un rûl di façade?**

«No son dubis».

**Cualis tematichis vuelial meti tal centri dal so mandât?**

«Il riferiment e je la tutele e la valorizazion de lenghe furlane che par me e va intindude ampliantle a ducj i dirits dal popul furlan. In Friûl a son diviersis comunitâts linguistiche (slovens, gjermanofons, venetofons...), ma il popul furlan al è la comunitât prevalente in tiermins numerics, che invezit e risulde tant indaûr in tiermins di tutele. Cun dut il rispjet di chês altris minorancis, la situazion e va rieculibrade a pro dai furlans. L'abonament Rai lu pain ducj, lu pain ancje i furlans e a àn dirit ai servizis corispondents. La prime bataie e sarâ alore chê di puartâ a cjase une convenzion cu la Rai che e ricognossi finalmenti in maniere plene la esistence e i dirits dai furlans, cuntun ampliament signifi-



MARKUS MAURMAIR, GNÛF PRESIDENT DE ASSEMBLEE DE COMUNITÂT LINGUISTICHE FURLANE, ELET PAR ACLAMAZION A PALAÇ BELGRÂT A UDIN

**«Tant che Assemblee, o podin puartâ un contribût propositif ae fase anzunziade di riforme des autonomiis locâls. Al sarès ben che la Regjon e valorizâs il nestri rûl»**

catif des oris di trasmissions radio e televisivis in lenghe furlane. La autonomie speciâl dal Friûl-Vignesie Julie e dipent de compresence di diviersis popolazions, lenghis e culturis, duncje cheste e je une cuistion fundamentâl».

**Ancje parcè che si cjatin intal ventenâl de leç 482/99, che finalmenti e cun intart grâf e voleve dâ gjambis al principi costituzionâl de tutele des minorancis culturâls e linguistiche. E il belanç di dôs decadis nol è dal sigûr brilant. Cualchi concuiste, tant che l'insegnament de lenghe furlane intes scuclis, e je metude a pericol in maniere costante.**

«Cheste e je la seconde grande bataie: la atuazion reâl dal insegnament de lenghe furlane. La precarietà des nominis dai insegnants, cu la "gjostrè" des nominis sul tacâ dal an che e puarte tant personâl di difûr regjon, e va a pericol di puartâ a un insegnament dal furlan dome di façade. A son ator insegnants ecezionâi, cuntune passion infinide pal furlan, ma a son ancje situazions là che la marilenghe e je doprade

dome tant che clâf par otignî finanziaments internis suplementârs, ma dopo si esauris intal imparâ cualchi frase a memorie. E nol è chest che al covente par difindi une lenghe».

**La Assemblee de Comunitât linguistiche furlane e je nassude, intal intindiment di chei che le àn proponude, ancje cul pinsîr che cheste e podès diventâ une di il vèr "Parlament" dai furlans, un organism istituzionâl rappresentatif dal Friûl che nol è mai stât e che cumò nol esist plui nancje inte sô version une vore parziâl des Provinciis. Isal un obietif realistic?**

«Tal rispjet massim de volontât dal legjislatôr regjonâl, o pensin di podê puartâ un contribût propositif a cheste fase anzunziade di riforme des autonomiis locâls. Jessint dai 5 agns de Zonte Serracchiani, caraterizâts di sietis caladis dal alt, al sarès ben che la Regjon e valorizâs il rûl dal nestri Parlamentut, che dut câs za cumò al esprim il pinsîr de plui part dai sindics dal Friûl-Vignesie Julie. Duncje, za vuê al podarès jessi un lûc impuartant di confront su lis riformis istituzionâls. Dopo, intal timp e podarès madressi une sielte che su cualchi materie e valorize il rûl de Assemblee sui temis identitaris. E sarès une svolte storiche pal Friûl. Bisugne capi se, dentri de sô riforme, la Zonte regjonâl e vûl introdusi altris organismis eletifs che a rapresentin il Friûl o une part di chel».

**La Assemblee de Comunitât linguistiche furlane no à di vè a ce fâ dome cun lenghe e culture. Sono altris temis che a tocjin dut il Friûl che di chei si puedi ocupâ?**

«Dal sigûr al è il teme dai coleçs elettorâi che o riproponarin. A une popolazione omogjenie tant che i furlans il sisteme elettorâl al à di dâur la pussibilitât di elei rapresentants de minorance intes istituzions democratiche. In altris teritoris, tant che il Trentin-Sudtîrôl, in non de tutele des minorancis il dissen dai coleçs elettorâi e i sistemis elettorâi a favorissin la elezion di rapresentants di chel teritori. Ca di nô chest nol è: par rivâ a elei un rapresentant de minorance furlane un moviment politic cumò al varès di cjapâ il 20% a nivel regjonâl, une cuote tant plui alte di chê che e covente a elei un dai 13 deputâts».

**E su altris temis impuartants là che il Friûl al à bisugne di une strategie unitarie, tant che il rilanç dal setôr des manufaturis o il teme des infrastruturis?**

«Par esprimisi su chescj temis e coventarès une sielte istituzionâl diverse. Si fevele di competencis amministrativis che no crôt che e puedi ocupâsi in chest moment la Assemblee de Comunitât linguistiche furlane. Se dopo, in futûr, in dialic cu la amministrazion regjonâl, si volaran ampliâ lis nestris competencis, noaltris o sin pronts, ancje tignint cont di chê che e pues jessi la evoluzion de Citât metropolitana di Trieste».

**Il fat che lui al sedi un sindic "di di là da la aghe", puèdial judâ a dismolâ chês tensions teritoriâls che dispès a menacin la unitât dai furlans inte difese dai lôr interès?**

«Propit parcè che o ven di un teritori che si sint metût sot atac dal pont di viste des conquistis storichis, al è difilic sostignî che nol sedi in at un atac ai dams dal Friûl Occidentâl».

**«Si ocuparin dal teme dai coleçs elettorâi.**

**Ai furlans il sisteme elettorâl al à di dâur la pussibilitât di elei rapresentants de minorance intes istituzions»**

Che e sedi la incorporazion des Cjamaris di Cumierç, che a sedin lis provis fatis a so timp di eliminâ la Prefeture, chescj events a nudrisin propit chel sintiment. Il Friûl Occidentâl al domande atenzion, ancje parcè che une part consistente de ex provincia di Pordenon e à fondis venitis fuartis. Chest al è un dai grancj temis istituzionâi che a tocjin la tignude de Regjon Friûl-Vignesie Julie e si 'nt fevelarà une vore. Par gno cont, o crôt che e sedi pussibile une riforme istituzionâl che, pûr tignint cont di une rapresentance unitarie dal Friûl, e puedi valorizâ il rûl di diviersis areis largjis che a àn carateristichis particolârs e omogjenis, ancje dissegnantlis in mût diviers des vecjis Provinciis». ■

**Par viodi chei altris contignûts  
de “La Patrie dal Friûl”,  
abonaitsi. Dutis lis informazions si cjatin sul sît  
[www.lapatriedalfriul.org](http://www.lapatriedalfriul.org)**

**Per vedere gli altri contenuti  
de “La Patrie dal Friûl”,  
abbonatevi. Tutte le informazioni si trovano sul sito  
[www.lapatriedalfriul.org](http://www.lapatriedalfriul.org)**

Che tu sedis za abonât o che tu le vedis lete dome cualchi volte,  
aboniti o rinove l'abonament a un mensîl unic:  
**almancul une volte al mê, lei par furlan!**

